

05/03/2002

Malawi puji pentadbiran media Malaysia

Wan Hazmir Bakar

KUALA LUMPUR, Isnin - Menteri Penerangan Malawi, Clement Stambuli, hari ini memuji pentadbiran media di Malaysia yang disifatkannya sebagai bebas berbanding di banyak negara lain yang dikawal ketat kerajaan.

Stambuli berkata, pengamal media di sini juga bukan saja profesional, malah berfungsi positif menjayakan agenda pembangunan negara yang dirancang kerajaan.

"Pentadbiran media di sini amat baik. Tidak seperti di negara lain yang begitu ketat," katanya kepada pemberita selepas mengadakan kunjungan hormat kepada Menteri Penerangan, Tan Sri Khalil Yaakob, di Angkasapuri hari ini.

Ketika kunjungan hormat itu, Stambuli yang diiringi tiga pegawai kanan Malawi Telecom Limited (MTL), diberi taklimat mengenai pembangunan penyiaran dan media akhbar serta melawat Pusat Siaran Antarabangsa (IBC) serta persembahan Orkestra RTM, di Auditorium Perdana.

Stambuli berkata, pengamal media perlu sentiasa bersikap profesional serta patriotik bagi menjayakan agenda pembangunan negara dan bukan mengikut rentak pembangkang yang sentiasa mengkritik dan menyalahkan kerajaan dalam setiap perkara.

Katanya, sikap sedemikian akan merosakkan pembangunan yang dilaksanakan kerajaan, sekali gus memberi kesan buruk kepada rakyat dan negara.

"Seperti di negara lain, pembangkang biasanya akan mengkritik kerajaan. Justeru, media perlu profesional dan patriotik. Apa saja yang mereka siarkan mesti mempunyai matlamat untuk pembangunan negara.

"Kadang kala kita ada media yang bertindak merosakkan banyak pembangunan dan ini adalah masalah di banyak negara. Kerajaan tidak seharusnya dipersalahkan dalam setiap perkara. Media harus bertanggungjawab dan inilah apa yang saya lihat di negara ini," katanya.

Mengenai lawatannya ke sini, Stambuli berkata selain memperkukuhkan hubungan dua hala, ia bertujuan membincangkan serta menyelesaikan masalah berbangkit berhubung rancangan Telekom Malaysia menambah pelaburan di Malawi.

Sambil memuji pembangunan pesat Malaysia pimpinan Perdana Menteri, Datuk Seri Dr Mahathir Mohamad, beliau berkata Malawi menghargai pelaburan Malaysia menerusi Telekom Malaysia sejak 1995.

"Saya datang untuk menjalinkan kerjasama serta mendapatkan bantuan Malaysia dalam apa saja bidang," katanya sambil menambah Malawi mengalu-alukan pelaburan Malaysia dalam bidang penyiaran.

Sementara itu, Khalil berkata Malaysia menawarkan dua tempat latihan dalam bidang teknikal dan rancangan penyiaran kepada pegawai Malawi, bermula Ogos depan.

Latihan itu adalah program bantuan teknikal Selatan-selatan yang diilhamkan Perdana Menteri.

(END)